

EA. EAEko hauteskundeak «plebiszito antzekoak» direla uste du



IÑIGO AZKONA

Israel Brull, Sabin Intxaurreaga eta Jose Luis Uzabal, atzoko agerraldian.

Maiatzaren 13ko bozetan EAKo kideek ENA ez dutela erabiliko dio Intxaurreagak

Agiria «bihotzean» eraman arren, ez dute botorik «oparitu» nahi

Joseba Arruti | BILBO

Datorren maiatzaren 13ko EAEko hauteskundeetan Espainiako Nortasun Agiri Nazionalarekin, gida baimenarekin edo pasaportearekin bozkatzeko eskatu zuen atzo Eusko Jaurritzako Justizia sailburu eta Eusko Alkartasunako batzorde eragileko kide Sabin Intxaurreagak. Hauteskunde Batzordeak hauteskontzietara hurbiltzen diren hiritarren nortasuna egiaztatzeko Euskal Nortasun Agiria (ENA) ez duela onartuko jakinarazi ostean etorri dira Eusko Alkartasunako sailburuaren hitzak.

Euskal Herrian «botere judicial propioa» ez izatearekin lotu zuen Sabin Intxaurreagak Euskal Nortasun Agiriaren inguruan hartutako erabakia, eta «gainerako esparruetan eman den deszentralizazio maila arlo judiciallean jazo ez izana» salatu zuen irmotasunez. Hala ere, «indarrean dauden esparruak errespetatu» egiten dituztela adierazi zuen sailburuak, «nahiz eta, sarritan esan dugunez, horiekin bat ez gatozen eta horiek gaiditzeko borondatea daukagun».

Intxaurreagaren irudiko, EAEko hurrengo hauteskunde autonomikoak «plebiszito antzekoak» izango dira, «garrantzitsuak

eta erabakigarriak». Horregatik, kazetariei adierazi zenez, «ezin da botorik oparitu eta ezin dugu gure buruaren aurka jokatu».

Hala, ENA elkarteak plazartutako nortasun dokumentua «bihotzean» daramatela eta Hauteskunde Batzordeak erabakitako berorren debekuaren aurkakoak direla nabarmendu zuen Eusko Alkartasunako buruzagiak, baina maiatzaren 13ko hauteskundeetan, arrazoi praktikoak tarteko, Espainiako nortasun egiaztatari ofizialaz

baliatu beharra azpimarratu zuen.

Futbol partidu baten antzeko hauteskundeak

«EAEko datozen hauteskunde autonomikoak Euskal Herriko eta Espainiako selekzioen arteko partidu baten antzekoak izango dira», adierazi zuen Sabin Intxaurreagak, «eta guk euskal selekzioaren garaipenaren aldeko hautu garbia egiten dugu, nahiz eta kanpoan jokatu eta arbitroa haiek jarritakoa izan».

EA-KO KIDEEN ITXIALDIA

Giza eskubideen aldeko ekimena

Eusko Alkartasunako Bizkaiko Txorierrri, Butroe eta Uribe Kosta eskualdeetako ordezkari eta kideek itxialdia egingo dute gaur eta bihar, Berangoko udaletxean. Ekimen horren helburua giza eskubideekiko errespetuta eskatzea eta horien inguruan euskal hiritargoa kontzientziatzea izango da. EAKo ordezkari Israel Brull eta Jose Luis Uzabalek atzo jakinarazi zuten, itxialdia gaur hasiko da, goizeko 11:30ean, eta bihar-ko bazkalordua arte luzatuko da. Hiru hitzaldi antolatu dituzte EAKoek ekimen honen barruan: bata ETaren bortizkeriaren inguruan, Elkarri gizarte mugimenduaren eta Bakearen Aldeko Koordinakundearen eskutik, bigarren bat herrien eskubideei buruz hausnartzeko, Autodeterminazioaren Biltzarrak taldeko kide batek emango duena; eta hirugarrena presoan egoera aztertzeke, Senideak-Gureak eta Pastoral Diocesana taldeek eskainitakoa.

LAGUARREAN

EUSKAL PRESOK

Presoak Euskal Herrira ekartzea aldarrikatzeko Iruñeko espetxera martxa egin zuen LABek atzo



JOXE LACALLE

LABeko hainbat delegatu Iruñeko kartzelan kontzentratu zen.

LAB sindikatuko hainbat kidek presoan Euskalherriratzea aldarrikatu zuten atzo eguerdian Iruñean. Elkarretaratuek giza kate bat eginez iragan zuten Alde Zaharreko Navarrerria plaza-tik kartzelaraino doan bidea. Kartzelaren aurrean presoan oinarrizko eskubideak errespetatzeko eskatu zuten.

Otano auziaren artxibatzeari apelazio helegitea ezarri diola gogoratu du HBk

Epaileak *Otano auzian* HBk aurkeztu erreforma helegitea aintzat ez hartu izana kritikatu du HBk. Taldeak gogoratu du apelazio helegitea aurkeztu duela Nafarroako Entzutegian. Hala, Iruñeko Entzutegiko 3. Areatoak esanen du *Otano auzia* lau urte baino gehiagoko instrukzioaren ondoren ongi artxibatua dagoen, ala prozesuarekin jarraitzen den. Hemendik 3-4 hilabetera jakinen da behin betiko autoa.

Azkenaldian Otxandio jasaten ari den «jazarpen poliziala» salatu dute AABek

Amnistiaren Aldeko Batzordeak salatu dutenez, azken bi hilabeteetan Otxandiko herritarrek «jazarpen polizial zorrotza» jasaten ari dira. «Bai autoz, bai oinez, herritar ugariri jazarpena egiten ari zaizkie uniformerik gabeko pertsonak», adierazi zuten AABek. Etxeetako buzoiak, eta autoen matrikulak kontrolatzen dituztela esan zuten. Gainera, Guardia Zibilaren kontrolak ugaritu egin direla jakinarazi zuten.

Atarrabiara «gera eta bortizkeria bultzatzera joatea» leporatu dio EHk Miguel Sanz presidenteari

Atarrabiako EHko zinegotziek Miguel Sanz UPNko lehendakariak egindako adierazpenak salatu dituzte. Murillo Atarrabiako UPNko zinegotziaren aurkako eraso gaitzesteko udalbatzan EHk esandakoak, zinegotziak «aurrerapauso» deitu izana kritikatu zuen Sanzek. EHk erantzun dio Atarrabiara «gera, gatazka eta bortizkeria bultzatzera» ez joateko. Ildo horretan, «UPNn ez ezik, gizartearen ere pentsamendu uniforme eta bakarra» inposatu nahia leporatu die. Gertakariok salatzeko manifestaziora deitu du 19:00etan, etzi, Atarrabian.



**HERNANIKO
UDALA**



IRAGARKIA

Helburua: Uztaileko Udaleku Irekietarako begiraleak kontratatzea

Izena emateko epea: apirilaren 23tik maiatzaren 11ko 13:00ak arte.

Eskabide-orriak eta Oinarriak: Euskara Zerbitzuan eskura daitezkeen eskabide-orriaren eredu ofiziala betetzea nahitaezkoa izango da.

Informazio gehiagorako: Euskara Zerbitzua, 943-33 70 00.

Hernanin, 2001ko apirilaren 18an. Euskara delegatua.